

**Anwar bawa Mat Taib sertai pentadbiran Selangor, jika menang Kajang**  
**Malaysian Insider**  
**Feb 13, 2014**  
**OLEH MOHD FARHAN DARWIS**

Calon Pilihan Raya Kecil (PRK) Dewan Undangan Negeri (DUN) Kajang, Datuk Seri Anwar Ibrahim akan membawa masuk veteran Umno, Tan Sri Muhammad Muhammad Taib ke dalam pentadbiran Selangor selepas selesai pilihan raya kecil itu.

Ketua pembangkang itu berkata, selain kepakaran pengurusan ekonomi oleh Menteri Besar Selangor, Tan Sri Abdul Khalid Ibrahim, kepakaran program desa yang dimiliki Muhammad yang dikenali sebagai Mat Taib juga amat diperlukan dalam pentadbiran Selangor.

"Saya akan panggil Tan Sri Muhammad Muhammad Taib. Dia ada kepakaran program desa," katanya di hadapan kira-kira 200 penyokong PKR, di Kompleks Penghulu Batu 10 Cheras, di Kajang, malam tadi.

Pengumuman Anwar itu dilihat sebagai mengesahkan lagi spekulasi beliau akan menggantikan Abdul Khalid sebagai menteri besar Selangor sekiranya menang PRK Kajang.

Dalam ceramahnya malam tadi, ketua umum PKR itu berkata, tindakan Ketua Menteri Sarawak, Tan Sri Abdul Taib Mahmud melepaskan jawatan beliau ibarat "meludah ke muka sendiri" oleh pemimpin parti kerajaan memandangkan mereka selama ini mengkritiknya disebabkan isu peletakan jawatan bekas Ahli Dewan Undangan Negeri (Adun) Kajang, Lee Chin Cheh.

"Itu di Sarawak bukan membazir. Itu menjimatkan.

"Tidak selesai dua minggu mereka kutuk kita, dia (Taib) letak jawatan," katanya.

Muhammad yang turut dikenali sebagai "Mat Tyson" dalam arena politik negara sebelum ini mengumumkan menyertai PAS menjelang Pilihan Raya Umum ke-13 (PRU13).

Beliau melepaskan jawatan sebagai menteri besar Selangor pada 1998 setelah Mahkamah Majistret Brisbane memutuskan beliau bersalah membawa wang tunai berjumlah RM2.4 juta ke Australia.

Jawatan tertinggi yang pernah dipegangnya adalah naib presiden Umno (2000-2003), dan ketua penerangan Umno (2008-2009).

Beliau yang pernah menjadi menteri besar Selangor antara 1986 hingga 1997 turut dilihat berkempen ke seluruh negara membantu Pakatan Rakyat (PR) dalam kempen mereka menjelang PRU13.

Anwar dalam ceramahnya turut mempersoalkan pertikaian berhubung kempen PRK DUN Kajang PKR, kerana beberapa pihak berkata ianya dilakukan di luar waktu berkempen.

"Saya tidak pernah dengar berkempen sebelum tempoh kempen ini salah. Hanya di Malaysia," katanya.

Pemimpin pembangkang itu bagaimanapun bersedia bekerjasama dengan polis untuk menjalankan siasatan mereka.

"Polis kata hendak siasat, siasatlah. Siasat cara baik.

"Nanti saya tulis surat kepada KDN (Kementerian Dalam Negeri), siasatlah kes rompak kes samun. Balik-balik nak siasat Anwar Ibrahim," katanya.

Beliau juga yakin usaha PR untuk menawan Putrajaya daripada penguasaan Barisan Nasional (BN) akan berhasil berikutan peningkatan kos sara hidup yang akan mencetuskan kemarahan rakyat.

"Saya yakin kita boleh merintah. Insya-Allah, dengan orang marah dengan kenaikan harga barang.

"Saya yakin, Kajang... kita mantapkan kekuatan Selangor, ekonomi kita, pertumbuhan kita ada baiknya," kata ahli Parlimen Permatang Pauh itu.

PR sudah mengumumkan Anwar sebagai calon mereka bagi PRK DUN Kajang sementara BN masih belum lagi menamakan calon mereka.

PRK Kajang diadakan berikutan penyandang kerusi itu, Lee meletakkan jawatan secara mengejut.

Lee, 42, merupakan seorang peguam dan bekas ahli parti Gerakan selama 10 tahun.

Dalam PRU13, Lee mendapat 19,571 undi, berbanding calon BN, Lee Ban Seng yang mendapat 12,747 undi.

Komposisi pengundi di Kajang membentuk 49% Melayu, 40% Cina, 10% India dan 0.91% lain-lain.

Suruhanjaya Pilihan Raya menetapkan tarikh PRK DUN Kajang pada 23 Mac dan hari penamaan calon jatuh pada 11 Mac. – 13 Februari, 2014.

Hakcipta © 2013 The Malaysian Insider

Source:

<http://www.themalaysianinsider.com/bahasa/article/anwar-bawa-mat-taib-sertai-pentadbiran-selangor-jika-menang-kajang>